



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 8. Kalenderwoche – ab 22. Februar 2009

# Bährlien is Weldschdadt!

Nee, Bährlien is jedzde werglisch eene dodahle Weldschdadt gewordn! Isch bin vorsche Woche grade widdorma in Bährlien gewähsn... mid meinor Gudstn... ma drei Daache, wo mir bei unsorm, Schwachor gewohnd hamm. Also, bei meim Schwachor. Was dähr aus dor Sischn von meinor Gudstn fiehr een vorwandschafdlischn Schdadus hamm dud, weeiß isch gahr nisch genau. Wenn dähr mei Schwachor is... - ja, was is dähr dann von meinor Gudstn? Nee, da kenn isch misch nisch so genau aus. Das dud mir ibrichens ooch mid unsorm Neffe so gehn. Wobei isch bei dähm Neffe nisch ma weeiß, wie dähr mid Familjenname heeßn dud. Mir sachn immor - dor Neffe! Werglisch e bleedor Vorname!

Ja, in Bährlien hamm mir bei meim Schwachor gewohnd. Brenzlauor Berg! Un dord hads misch ooch gleich umgehaun - eene Kneibe an dor annorn. Abor nisch bloß drei viere... nee, zweehunnord bis dreihunnord odor noch mähr! Kenn Sie sich das vorschdeln? Die Häusor sinn so ähnlich wie bei uns offm Kaßberg villeischd.... ooch so in immor im Garreh gebaud... abor nu viel greeßor als dor Kaßberg un im Erdgeschoß bei alle Häusor Kneiben, Kneiben, Kneiben un annre Geschäfte. Un es sinn ooch Leide drinne in die Kneiben! Nisch bloß Lufd!

Daderbei dun die Leide dord nisch aussähn, als wie wennse viel mähr Geld vordien dun, als wie dor normale Gemnidzor. Abor dor Bährliener hoggd ehm nisch so gerne in dor eischen Wohnung vor dor Glodze rum - nee, dor Bährliener suchd de Gesellschkeit! Dähr will bißl was erlähm! Ja, mir Gemnidzor sinn so rischdische Grieschdiere - mir vorgrieschn uns daheeme un dun wardn, bis mir widdor off Arbeed gehn missn. De Vorgrieschungssuchd is bei uns nisch so ausgebräschd.

Un dor alde Fernsähdurm machd sich nach wie vor werglisch brima im Schdadtbild! Schade, dass

dor Ballasd dor Reubligg weg is... da dud jedze was fähln... abor sonsd... grade dann die Gäschend so um dähn Bodsdammor Bladz... die Hochheisor... die Hodels... das "Ridz-Garlsonn-Hodel" un das "Heijedd" - wo bloß welsche schlafn dun, die werglisch de Geldkacke ham...

Nee, mir sinn werglisch biff un baff gewähsn! Un das Gewimml... nadihrlisch ooch jede Menge Jabahnor... un Schinehsn... un Russn... un Dirkn... un Dscheschn... Du haddesd manschma Mieke, irschendwo een heimadlischn Dialeggd offzuschnabbn. Wos doch eischendlich heeßd, dass iborall un immor e Sachse dabei is! Nee, dord in Bährlien dun mir Sachsn kaum noch brähsend.

In dor S-Bahn dun de Ausländor dann absoluhd domeniern. Da siehsde die nisch, die im "Heijedd" wohn dun odor im "Adlon", da siehsde ehor die, die in de U-Bahn-Dunnel benn odor off dor offnen Schdraße im Dregg. Nee, soviel arme Schweine, wie de in Bährlien sähn dusd, hamm mir in Gemnidz nisch. Ooch diesbezieischlich sinn mir werglisch absoluhde Brofinz! Un so gesähn, had ehm ooch de Brofinz ihre Vordeele!

Un ooch die, die im "Heijedd" wohn dun, meschde isch nisch unbedingt jedn Daach sähn.

**Eduard Sachsenmeyer**